

Filosop

Se Vükiped: sikloped libik

Filosop (se Vöna-Grikänapük: *φιλοσοφία*, sinifü „sapilöf“), distü nolavs, no labon studadomeni gudiko pemiedetöli. In valem kanoy lelogön oni as töbid ad kontrolön u fümükön tikami ön mod krütik ä tikävik, as vätälam metodik, kel lüodikon buo lü plänäd valemik levala e dabina menik. Steifül alik ad miedetön suemodi: „filosop“ u studadomeni ona binon ya bal yegädas filosopa it.

Prim tikama filosofik Vesüdäna, ün tumyel 6id b. K., malon i daved jenotem tikäla yuropik. Me filosof e matemat vöniks, distü levalilogam netikälik miteoda, tikam menik sitöfik ä nolaviko ävolföl äjonon oki. Ünü tumyels, jäfüds e metods difik volivestigama e nolavas ädavedons se filosof ed ädistükons okis de ods.

Do vöd: „filosop“ licinon in vönaoleikod vesüdik, pösods mödik in jenotem kulivas votik ebejäfons yegädis sümik ön mods sümik. Filosofans lofüdäna pabespikons in yeged: Filosop lofüdäna; filosofans Nolüda-Frikop e Smala-Siyop ye palecedons as lü filosof vesüdik dutöls, ibä äkosädons kösömiko ko Yurop.

As zänajäfüds filosopa kanons palecedön **tikav** (o. b. nolav tikama verätik), **südav** (o. b. nolav dunama verätik) e **metafüd** (o. b. nolav kudas balid dabina e lejenöfa). Lä ats kanon paläükön i **sewav**, kel bejäfon valemö mögi e modi sevidageta, e patiko modis sevidageta nolava alik (a. s. filosop jenava, filosop matemata e r.). Atimo säkäds veütik ä nitediks padöbatons fa filosop tikäla e menav filosofik.



Auguste Rodin: „Tikan“ (1880-82), se el Ny Carlsberg Glyptotek in København.

Ninäd

Nüdugot

Kis binon-li filosof?

Siäm e mods filosofama

Metods

Jenotem filosopa: suemod e nolav

Dö suemod

Nolav ed oksuem filosopa

Jäfüds filosopa

Filosop teorik

Tikav

Sevikrüt e sevateor

Nolavafilosop

Metafüd e dabinav
Pükafilosop
Filosop plagik
Südav e metasüdav
Gitafilosop
Bolitafilosop
Jäfüds nulikum
Filosop tikäla e seveda
Menav filosofik nulädik

Müster filosofik

Literat

Nüdugot

Dabinons säkäds, kels no kanons pabevobön te yufü nolavs „kösömik“: säks tefü gud e bad, tefü sinif gida, tefü dabin Goda e lana menik nedeädöfik, tefü siäm lifa. Klad pluik säkas leigo no kanon pavestigön te fa nolavs. As sam, lifav fe vestigon voli e binodi liföla, ab no kanon fümetön „binäli“ liföla, no kanon lonön, va e ven lifafoms dalons padeidön, e no kanon jonön, gitätis e sötis kisikis lif davedükon. Yufü füsüd e matemat nataloneds kanons fe panotodön, ab säki, va nat binon vo lonedilabik, nolav nonik kanon gespikön. Gitav kanon vestigön e jonön, va bos jenon baiädü lonem, ab no lonülön, ninäd kisik soton dutön lü lonem. Fino dabinons säkäds, kels topons lä mied tikama, soäs säk, va lejenöf nu fa pösod alik pabeliföl jenöfo dabinon. Ön jenets at plänamods nolavas valik dufalons; säkäds tefik binons binälo *filosopiks*.

Ya bü milyels tel filosofan Vöna-Grikänik: Plato änotodom dotis tefü mag, keli mens älabons dö oks e dö leval. Me *lekevaparab* famik okik,^[1] ävilom tikodükön, bevü votiks, dö mieds daseva e sienafäga mena nomik. Atan seadon kobü kemens okik in lekav, kö valans so pejänädons, das kanons logedön te lekevavöli fo oks. Lit pagivon fa fil, kel topon in lekev fago po mens. Vü fil e mens topon (leigo po mens) yegs difik papolons e pamüfons, kelas jads su lekevavöl palelogons fa mens as yegs veratik. Vögs e noids pödao jinons leigo lü mens as fa jads pakodöls. Me dinäd at hiel Plato leigodon lejenöfi kösömik obsik plödü lekev, kö sol stralon, e so jonon, kikodo filosofans dotons tefü verat e kurat sienafäga menik.

Filosop bejäfon ledino dinajenädis, kels nomiko jinons klüliks: „sötöl no deidön“, „demokrat binon gudikün reigamodas valik“, „verat binon utos, kelos blöfovon,, „vol binon utos valik, kelos topon in leval,, u “tiks binons libiks,,. Pas ven pö lesets at utos dotikon, kelos iblebon nesäkädik, davedon filosof. Mens, lü kels nos jinon binön dotik, neai rivons filosopi. Stunam, süpäd cilöfik, nekovenäl tefü vol u tefü ok it: val at kanon binön prim tikama filosofik. El Plato änotodom nuläli rigik at menas:

„Stunam binon lüäl mena, kel jenöfiko löfon sapi, ibä prim votik no dabinon pro filosof.“
PLATO, *Theaitetos* 155 D

ed i tidäb omik: Aristoteles äkonstatom:

„Stunam vöno - soäsä nog atimo - äkoedon menis befäjön filosopi.“
ARISTOTELES, *Metafüsüd* I 2, 982 b 12

Distü rels e grups reliek, filosof pö bejäf e bevob säkas „filosopik“ löpo pemäniotölas stabon te su tikäl, o. b. blöfädäm tikavik, kel flagon büocedis votik nonik (a. s. lekredi).

Kis binon-li filosof?

„Filosop“ no kanon pemiedetön valemō, bi alan, kel bejāfon filosopi, vōlfon lecedi lōnik dō din at. Sekū atos gespiks sāke löpo penotodōle binons so mödikis, ās filosofans it. Hiel Carl Friedrich von Weizsäcker āsagom balna: „*Filosop binon nolav, dō kel no kanoy spikōn nes ito bejāfōn oni.*“^[2]

Lü bligäds filosofa dutons primo vestigam metodas, prinsipas e lonöfa sevidageta valasotik, äsi teorodas e blöfastabas nolavikas. Yumedü atos, filosof kanon pasuemön as prinsipanolav, ibä betikam e säkam filosofiks ai efluköfükons nolavis ed estütöns volfami onsik. Filosof prodon säkis ut, kelas gespiki nolavs no (nog) kanons givön, bi gespik at no (nog) kanon patuvön te me sperimänts, kalkuls u vestigams votik me stums jünüik. Säkam sota at kanons ye dugön vestigami ini lüod nulik. Ön mod soik vestigasäks nulik padavedükons pö nolavs; kanoy kludo sagön, das filosof, se stanöp lönik oka, keblünon veütiko bumame teorodas nulik nolavas valik.

Tõbids votik filosopa tefons leodükami sitõfik seva menik ad jäfön volädamagodi lõlöfik keninükamü i völad, gitäts e söts menik.

Siām e mods filosofama

Mens mödik jåfons me filosof frutü oks: ad suemön gudikumo okis e voli, in kel lifons; ad gevön stabi gudik duname e volädamagode oksikes. Utan, kel fefo filosofon, säkon säkis krütik vole zü ok dabinöle, e no kanon fasiliko papölkön u patölatön. Völfamamögod filosofa stabon su säkam sogädatefas e su bevobam tefasitas no kösömikas, äsi su tefädükam lesagas relas e nolavas. Lif nesekidik, fa ok it pelonöl, stabü tikav e vätäl lönik (*sapere aude!*) binon zeil filosofölanas mödik.

Pö filosofam stabü frut pösodik kanons padistidön ledino mods
u lüäls tels:

Töbid ad volasap soton gevön tikäle lüäli e sefäli pö dinäds plagik valik lifa e gönön fägi leodükama siämik vala nulik lükömöl. Nefäkükov tikäla dub jen su vol soton vobedön, dat täläkt kanon reigätälo beliefön e bevobön dinädis valik. Utan, kele sap somik pagivülon fa kemens onik, kodon dub geükams e notodots okik magädi, das dagebon reigätäli at.

Votaflano *filosop as lifamod* kazeton gebi sekotas vätälama filosofik põ lifaplag filosofana. Lifön ön mod veratik, fomön lifi aldelik ön mod verätik: kondöts at büocedons tikami dibätikumo pedalärnöli ed ai volföli. Leigo veütos pro däläd tikama filosofik, das lokon sevädoviko põ lifamod.



Lovelogam lomazifas filosofanas veütik
anik in Yurop.



Siāmamāk sapa (1635), set latinik:
„*SAPIENS DOMINABITUR ASTRIS*“. Võdem
sinifon, ma tradutam libik: „Utan, kel
desiron sapi veratik, obinon reigan stelas
valik.“



El „Diogenes“ hiela Jean-Léon Gérôme, 1860. Pöträt magälik, kö paplösenon i dog (Vöna-Gr. κύων), kel ägivon nemi künidanes.

Gebafoms go seväriks filosopa pö lifamod ädabinons pato ün vönüp, bu val vü els stoikans, pikurans e künidans. Pro dial baiäda tika e duna, künidan: Diogenes se Sinope, me lifamod lölimiko stönik oka, ägivom sami suvo pamäniotöli slopanes äsi taanes lejona at. Balöf teora e plaga ye pakazeton i fa filosof lofüdänik.

El Diogenes, kel änotodom tikami folosopik oka dub refud e noam voladuna, jonon dub atos otüpo, das taked e livüp binons dil filosofama. (Vöd obsik: *jul* licinon de vöd Grikänapükik: *σχολή* siämü „livüp“ u „livüpajäf“.)

Merit gretik filosofama binälon in dugälam tika e blöfäda, ibä metodiko äsi plagiko (a. s. pö döbats) flags sevärik ä fikuliks padunons filosofane. Filosofam *kadämik* ü *nolavik* difon de filosofam *no kadämik* ü *aldelik* prinsipo no tefü säks, ab buikumo tefü top (nomiko *niver*) e tefü foms semik miedükama

filosopajäfa. Dabinons i baläds fomik semik ko *nolav* e pübam nolavik (o. b. vödedem jäfüdik). Zuo, jäf filosofama kadämik keninükon i gebi metodas dono pabepenölas.

Mens filosofiko pedugälöls difons de votikans no tefü gebid nolas (frutik) mödikum. Nomiko gebidon ones te lovelogam gudikum blöfastabas, kels ya pemäniotons e pegebons pö döbat tefü yegäd semik. Kluo kanos frutön, pö bespikam säkäda anuik semik (as sam: deicödet), ad säkön, tuvedamögis kinik filosof elofon dü yels lätik 2500 dabina okik, e lio ejenons jünü döbats tefü mobs at. Zu nols jenavik at, filosofan calik sötön fägön ad distükön lecedis prinsipiko jelodavikis, büologön sekis onsik e dientifön säkädis e taöfis.

Gebs e bligäds votik filosopa binälons in:

- bespikabükam säkas, suemodas, lesetas e lecedas staböfikas fa nolavs pagebölas: as sam, filosof kanon säkön, sinifi kinik labon vöd: „dig“, ven pagebon pö bespiks sogädava u gitava.
- suk e tuv säkas, suemodas, lesetas e lecedas no panotodölas, su kels nolavs pastabons; as sam, südav säkon: „kis binon-li gid?“ e vestigon sekü atos suemodi, stabis e stipis veütikün gitava.
- gespikam säkas dö tikamamods u tikamakösömots timädas pasetik, kela tuvedi yegs vönaoloveik in museds no fägons ad givön.

Metods

Metods filosopa keninükons töbids tikälik distöfik. Vöds: „töbids tikälik“ kanons tefon is vestigami tikamalüälas, tikamavönaoloveikodas u tikamajulas. Filosof ibo ai jäfon me tikam. „Tikam“ kanon binön: meditam, diletam, u „sitükam“ (dadilädam). Dasevs klienälik, lekredaverats e blöfastabs tikälik pavestigons e paxämons stabü lifalejenöf mena filosoföl, yufü med: tikam tikavik, täläktik ä krütik.

Tikam filosofik fägön zuo ad bespikabükön lölimiko vali, igo i filosopi it. Ön mod soik filosof äsvo primon dönu de ser me vobod filosofana alik. Ibo duton lü stadöp filosofik i fäg ad bespikabükön igo veratis jiniko aldelikis u staböfikis. Lü mens, kels no fägons ad lelogön lifalejenöfi as säkäd, dots somik jinons suvo bisariks. Palelogölo love tim lunüpi, filosof säkon tefü cifapüns lejenöfa aidönu stabasäkis ot, kelas begespikab e begespikamögs prinsipo blebons sümiks (el *Philosophia perennis*). Sekü votikams jenavik e sogädimiks pö lifadinäds ye ai zesüdons stabasäkes mena gespikafomams nulik. Ibo distü nolavs, filosof e jäfüds filosofik no kobükons ni dagebons vestigasekis laidüpi e valemo pezepölis („lejem filosopa“), ab te gespikis jenotemik, medü kels vitons „logedinaböfükami“ timäda alik anna tuvovikis pö nolavs. Sekü atos, kanoy lelogön filosopi as löl in ot it no ninädovik: as spikot säkädik love tumyels fovöl.

Ledino jäfidadomens tel kanons padistükön pö filosof „calik“: domen jenavik e domein sitik.

- Filosofans jäfidons *jenaviko* ven steifülons ad dönuliföfükön, suemön e plänädön lecedis e lesetis tikanas äs hiels Platon, Thomas Aquinas u Immanuel Kant. I bepenam tikamaluälas u tikamajulas filosofikas duton lü domen at, äsi vestigam jenotema tikamagodas e suemodas.
- Filosofans jäfidnons *sitiko* ven steifülons ad bevobön e jelodön lecedis tefü säkäd (u säkädem) semik, ad begesagön säkis ninü jäfüds filosofik, ud ad diletön stipis sevädik u nesevädikis säka u lesaga semika, ud ad kleilükön suemodis pö säks, lesets u leceds semiks komädölis. If säk binon samo: „men labon-li libavili?“, tän, ad mögükön gesagi, suemods: „vil“, „lib“ e „men“ (ba igo i suemod: „lab“) mutons padiletön e paplänön kuratiko.

Jäfidamods jenavik e sitik kanons prinsipo pamiedükön fa zeil vestigama filosofik alik. Filosofans mödik vobons ye jenaviko e sitiko. Domens at lölöfükons odi, ibä leceds e tikods filosofanas timädas büik veütöns pö döbats tefü säks sitik atimik, e bevobs sitik suvo yufons ad kleilükön e kuratükön lecedis filosofanas klatädik. Zuo säks adelik suvo kanons pasuemön e pabegesagön te if jenotem e büjenotem süikama onsik, äsi suemods e tuvedamobs büo pädageböls tefü ons, sevädons e pasuemons.

Jenotem filosofa: suemod e nolav

Dö suemod

Filosop: vöd pekoboyümöl me vöds Grikänapükik: *φίλος* (pron: *filos*) „flen“ e *σοφία* (pron: *sofia*) „sap“, sinifon kuratiko „sapilöf“, u gudikumo „nolilöf“, ibä *sofia* äsinifon primo fägis e skilis valik, igo i plagikis u kaenikis. Värb: *filosopön* äpubon balidnaedo in lautots jenavana Grikänik: Herodotos (I, 30, 2), kö pägebön ad bepenön nolidesiri tatana: Solon (zao 640-559 b. K.) in Athena. No verätos, das hiel Herakleitos ya ige bom suemodi: *philosophos*.^[3] Vöno äkösömos ad lesagön, das hiel Püthagoras se Samos inüdugom suemodi: filosof. Platonan: Herakleides se Pontos äkipedom konoti, ma kel el Püthagoras isagom, das te god dalabon eli *sophia* veratik, e men kanon te steifön lüodü on. Is vöd: *sophia* ya sinifon noli metafüdik. Kredab konota at, te dilo e nestedöfo pekipedöla, nog padöbaton fa vestigans. Pas in lautots hiel Platon suemods: filosof e filosofön pägebons ma sinif fa el Herakleides pämaniotöl, sevabo in telpikot: Phaidros (278d), in kel fümükoy, das steif ad sap (filosop) äsi dalab sapa fakipons odi, e das dalab sapa mögon te Gode.

Filosop dü jenotem okik ya pämieteton as steif ad gud, verat e jön (Platon) u ad sap, verat e dasev (Hobbes, Locke, Berkeley). Filosof sukon prinsipis löpikün (ma hiel Aristoteles) u dageti nola veratik (ma hiel Platon). Flagon dasevi vala, keninükamü i nelogädikosa (Paracelsus), binon nolav mögas valik (Wolff) ed i Levera (Fichte, Schelling, Hegel). Leodükon e yümon nolavi lölik e nolavis valik (Kant, Mach, Wundt), binon it „nolav nolavas valik“ (Fechner). Zänodapün onik binon diletam, bevobam e miedetam kuratik suemodas (Sokrates, Kant, Herbart). Filosof binon ye i lekan ad deadön gudiko (Platon), ed i südav nomik (Windelband), ed i steif tikälik ad läb (Epikur, Shaftesbury) u steif ad tug e skil (Aristoteles, Stoa).

De stanöp Yuropa suemod: filosof yumon ad licin in Grikän vönik. Tikamajuls siyopik leigo bäldiks mö milats yelas (*filosop lofüdänik*) suvo paglömöns u panedemons. I sits relik dutons lü filosof, if gebans onik blöfädons ne godaviko, a filosofiko.

Nolav ed oksuem filosofa

Oksuem filosofa as nolav evotikon mödikna dü jenotem okik. Filosofans Grikänik balid jü zao timäd hielas Sokrates e Platon äsuemons dunami oksik as steif ad daced medü täläkt e tikäl, distü lasum balugik vönaoloveikodas u miteodemas. Ön mod at tikam älivikon de miteod, ab votaflano miteods nomiko no

pädeimons. Filosofans ägebons onis vilöfo: yufü notodots e metafors poedik, äfägons ad pakön lejoni oksik.

Du el Sokrates e tidäbs omik älelogons steifi ad dasev as zeil in ok it, sofimans älofons tidodis oksik tä monapel. Pro sofimans mödik, ätefos te kani ad vikodön pö döbat ta neflen yufü meds spiköfavik e käfeds tikavik. Zeil onsik äbinon „ad vedükön nämikum flani fibikum“ (l. el Eristik) igo me käf.

Posä Krit ägeton rouli veütik finü timäd vönik, filosof dü tumyels mödik ävedon mögik te stabü tikamagots reliek ettimik; no ädalon ad bespikabükön stabalesetis godava kritik. Miedükams sümik ädabinons i vü slamans e yudans. In Vesüda-Yurop äregon lunüpo tikamagot, das filosof binon jidünan godava (*ancilla theologiae*), o. b. yufanolav, kel söton stütön dasevädükami godik me blöfäds tikälik.

In nivers, kels ädavedons dü zänoda-timäd, filosof ävedon bal tidajäfüdas stabik („propädeutik“). Pö stud, els Artes liberales (Lekans Libik) älabons rouli veütikün. Lü ons ädutons „gramat“, „spikotav“, „spiköfav“ äsi „geomet“, „kalkulav“, „stelav“ e „müsig“. Finükam benosekik ela studium generale at („stud valemik“) äbinon stip pro studs „löpikum“: sanav, git, godav. (Nog adelo nems niveradiplomas fövons vönaoloveikodi at: B. A., M. A., Ph. D.).


In Vesüda-Yurop kosäd vemöfikum ko filosof ela Aristoteles ägretükumon liväli filospa, kel älovestepon miedis elas *artes* (= jäfüds). Filosofans e godavans mödik, äs Albertus Magnus e Thomas Aquinas ästeifüloms ad miedükön fluni lautotas ela Aristoteles ed ad kobioblinön filosopi omik e lejoni glüga katulik, dat övedons plän valemik lejenöfa. Kobäd somik pämobon fa el Thomas Aquinas me el Summa theologia. Nesekidiko äprimoy ya ün tumyel 12id ad ledigidön „noli stabü plak“: stip veütik daveda tikama natanolavik e metoda sperimäntik timäda äsököl.

Sis timäd Dönuliföfikama filosof aiplu älovestepon miedis, kelis godav ibüdülön one. Filosofans no plu äplafikons pö jelod cedas no äbaiädölas ko lejon glüga ud igo ko krüt. De tim Menima Dönuliföfikamik e Kleilükama jü nutim filosof edöbaton krütiko ko rel, elivükon oki de on, ed elelogon oki suvo löpikumi. Ai ädabinons ye filosofans mödik, keles baiäd lecedas filosofik e lekreda reliek onsikas vemo äveüton.

Ledino ün periods anik Nulatimäda filosof päsuemon as nolav valemik löpikum ka nolavs votik, kel sukon e gebidükon veratodis laidüpio lonöfölis ad sienön e suemön lejenöfi as löl ed ad lükömön lü kods e prinsips lätiks (el Philosophia perennis). Jü tumyel 18id filosof äblebon bal löpajäfüdas klatädik fol. Stud staböfik filosofa äzesüdon studane ad dalön jäfön me säkäds e vestigam natanolaviks. In nivers vönaoloveik anik, filosof staböfik (*Philosophicum*) as dil stabastuda binon nog blig studanas valik.

Ün tumyel 19id natanolavas äprimons ad nesumätikön e livätikön aiplu de filosof; poso i jäfüds püka- e sogädanolaviks ädunons otosi. Tidodems niverik filosofik aiplu päflunons tefü ninäd fa „dona-jäfüdükam“ ü „patädükam“ nolavas älivätiköl. Äblibon pö filosof te bligäds meditama dö nolavs votik e bespikama stipas onsik.

Filosop: nolavajäfüd atimik gidükon oki medü lesag, das methods filosofik kanons keblunön i nolaves, kaenes e lekanes votikes. Filosofans zuo cedons kleilükami yegädas e cifasäkädas südavikas jäfidatopädi legik okas. Nivers atimik e tidodems onsik peflunons tefü oksuem okas fa filosofajäfüds vönaoloveik: tikav, südav, sevav, nolavateor ü nolavafilosop e filosofajenav. Klu vobam filosofa in nivers jenon noe livü rel abi



„Filosop as Jireg bevü Lekans Libik Vel“ – Magod se el *Hortus deliciarum* (Gad Dafredas) hiela Herrad von Landsberg (tumyel 12id)

livü sogädanolavs, literat e lekans: filosof biton as filosof teorik e kazeton nolavafilosopi, pükidiletami e tikavi. Too ai laidabinon pö „nolavajäfüd: filosof“ desir ad kompenön pö döbats notidik atimik ed ad jelodön lecedis samo tefü säkäs südavik gebama kaenava, züamöpv, gerädav, säkäs sanavik u säkäs filosofa bevükulivik.

Zu filosof niverik ai dabinons i tikans neseکیدik plödü stidem calöfik. Sisä pänemons „*philosophes*“ in Fransän i jelodans Kleilükama soäs Voltaire, Rousseau e Diderot (as jäfidükan *Siklopedia* zeilü kleilükam medü sev), elecedoy filosofanis bai vönaoloveikod hielä Montaigne i lautanis nolik, kels sevädükons cedis e tikodis oksikis tefü yegäds notidik veütik: nolans valemik äs hiels Goethe e Schiller. Tikans mödik ün tumyels 18id e 19id no äbevoboms filosopi kadämik in nivers, vü kels hiels Adam Smith, Abraham Lincoln, Jean Paul, Friedrich Nietzsche, Émile Zola, Lev Tolstoy, Karl Marx, Sigmund Freud e Søren Kierkegaard. Too tikans at ädavedükoms tikamagotis e suemodis filosofik vemo veütikis ed äflunoms döbatis notidik ön mods valasotik. Atimo tikans soäs Paul Watzlawick, Umberto Eco e Peter Sloterdijk kanoms paleigodön ko oms.

Jenot nulik binon stit „dakonsälama filosofik“, kel lofon dakonsälamafonäti lönik ä difiki de votiks (a.s. reliks u lanaviks).

Jäfüds filosofa

Filosop padonadilon nomiko ad donatuigs tel: plagik e teorik. *Filosop teorik* vestigon mögis e miedis nola menik, äsi binodis valemik seveda menik. Zuo binons lesags valemik dö bin e dabin yegäd tikama filosofik. Jäfüds binons: dabinav, metafüd, tikav e sevav. *Filosop plagik* jafon votaflano me domen dunama menik. Jäfüds binons: südav, gitav, filosof bolitik e filosof sogädik.


Do nitedasfer filosofa prinsipo no kanon pamiedön (ibä filosof bejäfon „vali“), dabinons *domens* semik, tefü kels filosof binon patiko jäfedik. Filosofan: Immanuel Kant änaöfodönuom onis me säks fovik:^[4]

1. *Kisi kanob-li sevön?*
2. *Kisi sötob-li dunön?*
3. *Kisi dälob-li spelön?*
4. *Kis binon-li men?*

Säks at kanons paplänön ön mod soik:

1. *Lio fägobs-li ad sienön benosekiko, e lio sienots onsik sötöns-li pacödön?* (teor nolava e siena; tikav)
2. *Lio sötobs-li kondötön?* (südav)
3. *Kis vol binon-li? Kikodo dabinon-li bos (pla nos)?^[5] God dabinon-li? Jenotem labon-li zeili, e, üfü gespik siik, zeili kinik labon-li?* (metafüd, filosof rela e jenava)
4. *Dabinäds kinik binobs-li? Lio stadobs-li kol vol, keli tuvobs zü obs?* (menav filosofik, filosof kultura e sogäda, jönav)

In diläds sököl, ans jäfüdas filosofik veütikün pabepenons, kels bejäfons säkis at. Sökaleod dilädas pestabon su dist vönaoloveik vü filosof teorik e filosof plagik, pelölöfüköl dub volfams nolavik e vünolaviks degyelas lätik.



Lovelogam jäfüdas filosofa ma donadilam kösömik.

Filosop teorik

Tikav, sevav e metafüd befeitons odis ad meritön benodistükami as jäfüd filosofik löpikün. Nolavs kil at lesagons, das bejäfons stabis e prinsipis dibätikünis tika valik e verata valik, o. b. lonis e binodis staböfikünis lejenöfa.

Tikav

Tikav jäfon ne me ninäds dabinotik, ab me noms tikama verätik. Tikav säkon, stabü noms kinik seks semik kanons (u no kanons) pakludön de büoceds e buosetäds semiks (l. mikludods). Sekü atos, tikav bespikabükon stabis nolavas blöfädigeböl valik.

Primo vöd: „tikav“ pägebon ma siäms vidikün, kas atimo. Sam patedik binon tikav ela Stoa, kel äkeninükon i säkädis, kels atimo dutons lü sevav ü sevateor, pükafilosop, ed i spiköfav. Tikamagots soik kanons patuvön pö buks mödik dö tikav jü prim tumyela 20id.

Ma filosof atimik sinifon tikav as nolav kludama verätik te nog tikavi fomik, kel duton i lü matemat e nünömv. Nog döbatoy, viomafädo tikav keninükon yegädis no matematikis äs samo blöfädeteor e spikadunateor.

Vü tikavans veütikün filosofajenotema sötöy mäniotön hiel Aristoteles, hiel Krüsippos di Soli, hiel Johannes Buridanus, hiel Gottlob Frege, hiel Charles Sanders Peirce, hiel Bertrand Russell, hiel Alfred Whitehead, hiel Kurt Gödel e hiel Alfred Tarski.

Sevikrüt e sevateor

Pos „levolut“ filosofik ela Immanuel Kant, sevikrüt evedon cedü filosofans mödik donajäfüd staböfik onsik. Vestigon prinsipis, büocedis, mögis e miedis (da)seva menik. Distü sevateor, kel vestigon i davedi, jenotemi e sävilupami sevafäga menik, sevikrüt bejäfon te „stipis möga daseva“.

Sevateor (ü sevav) prodon in valen säkis tefü mög ad dagetön e fümükön sevi. Seko jäfon me säkäds vestigama e fümükama verata u neverata teorodas. I sienam lejenöfa pabespikabükon fa sevateor, äsi mods, ön kels pük e tik flunons dasevi. Zuo steifülön ad tuvön miedis daseva, kelos prinsipo kanon palelogön as „nolavik“.

Sevateorans famik äbinons (vü votikans) hiel Platon, hiel Aristoteles, hiel René Descartes, hiel John Locke, hiel David Hume, hiel Immanuel Kant, hiel Auguste Comte, hiel Edmund Husserl e hiel Ludwig Wittgenstein.

Nolavafilosop

Nolavafilosop labon tefis veütik me sevateor, bi vestigon, dileton ed igo mobon büocedis, metodis e zeilis nolava. Fümükon bu val miedis suemoda: „nolav“, „nolavik“, ad teilön oni de jäfüds votik no nolaviks. Lü yegäds onik dutons prinsipis metodavik staböfik, kels no kanons pavestigön e pafümükön fa nolavs it. As sam: zesüd dönuova sperimäntas, prinsip konöma suemodas („jeifaneif hiela Ockham“) e prinsip neveratükova.

Nolavafilosop zuo jäfon me tefs vü sev nolavik e suemods verata e lejenöfa. I dadiläd e leodükam mögiks seva menik ma jäfüds e nivods, äsi vestigam prisipas progeda nolavik (l. samo paradigicein), dutons lü säkädem nolavafilosopik.

Jäfüdäns veütikün nolavafilosopa binon samo hiel Aristoteles, hiel Francis Bacon, hiel Rudolf Carnap, hiel Karl Popper, hiel Thomas Kuhn, hiel Paul Feyerabend e hiel Hilary Putnam.

Metafüd e dabina

Metafüd äfomon dü jenotem ti lölik filosopa ker i jenöfik ona. Metafüd steifülon ad pladön lejenöfi lölik, soäsä jinon lü obs, ini yumed siämöfik (suvo i sit valemik). Vestigon stabis e binodi valemik vola e bejäfön „säkis lätikün“ dö siäm e zeil dabina valik.

Metafüd padilon vönaoloveiko ad dil valemik ed ad dil patik. Metafüd valemik binon dabina, kel jafon me säkäs tefü stababinod dabinädas valik äsi dabina it. Metafüd patik padilon ad donajäfüds votik kil, kels vestigons:

1. dabini Goda, ed i patis mögik ona (*godav natöfik* ü *tikälik*);
2. mögi dabina lana nedeädöfik e vila libik, äsi difis vü stöf e tikäl (*lanav tikälik*)
3. kodi, davedi, binodi e zeili levala (*levalav tikälik*)

Nolavs me metodems oksik prinsipo no kanons ni vilons bejäfön säkädäs at, ibä yegäds metafüdik binons plödü sperimäntamögs ed igo plakamögs siämöfiks valiks menefa. Ifi nooy u lesagoy neveütiki dabini dilas plakaviko nevestigovikas lejenöfa, retons nog säkäs metafüda. Metafüd vönaoloveik pekrüton ön mods distik tel. Du Siädin e pladulanas filosopa diletik ün laf balid tummyela 20id äblöfädons pro finid metafüda medü diletam tikavik püka, samo hiel Martin Heidegger ästeifülon ad jafön stabis nulik pro metafüd medü loveikam love jenotem onik e votükam lölöfik säkädema onik ad diletam dabina menik (stabadabina, dabinafilosop). Vüo säkäs metafüdik vönaoloveik ai getons küpäli e nitedäli pö döbats filosofik (a.s. in donajäfüds äs filosop tikäla).

Metafüdäns veütik äbinoms vü votans hiel Platon, hiel Aristoteles, hiel Thomas Aquinas, hiel Leibniz, hiel Descartes, hiel Kant e hiel Hegel.

Pükafilosop

Pükafilosop vestigon tefis vü pük, tik e lejenöf. Diletam spika, samo diletam kuratik suemodas, peplägon vönao in filosof. De primüp ona, veüt legretik püka e spika pro kosäd, verativ, dasevamög e bepenam e sienam lejenöfa äbinon bal döbatadinas filosofa.

Ya vöno pädöbaton samo säk, va yeg alik igeton nemi okik „ma natäl it oka“ u teiko sekü sluds vilädik menas. I döbatadin veütik filosofa zänodatimädik: säkäd valemodas duton dilo lü säkädem pükafilosopa.

Pükafilosop atimik, kel ün tummyel 20id äkodon sonemiki „flecki pükavik“ (*linguistic turn*), bejäfön vü votiks sekidi daseva lejenöfa de mögs püka alik (l. „hüpoteti hielas Sapir e Whorf“), jafami verata, daseva e nola medü kosäd („pükapleds“ hiel Ludwig Wittgenstein), modi, ön kel plöpoy ad dunön bosi yufü geb püka (John Langshaw Austin: „*How to do things with words*“; l. i pragmati), fluni mitiröl püka in lejenöf (l. samo vobi pükava vomimik), äsi säki ot, kis binon „sinif“.

Lü pükafilosopans veütikün dutoms hiel Gottlob Frege, hiel Charles S. Peirce, hiel George Edward Moore, hiel Bertrand Russell, hiel W. O. Quine e hiel Ludwig Wittgenstein. Keblünots veütik pädunons fa tidäbs hiel Ferdinand de Saussure (binodim), hiel Martin Heidegger (tümolog e nulavöds), hiel Michel Foucault (spikidiletam) e hiel Jacques Derrida (posbinodim).

Filosop plagik

Südav e metasüdav

Südav filosofik bumon stabü tikäl metodis ad cödön dunis, ed i cödon onis demü motivs e seks onas. Südav diston de südöfanomems vönaoloveik, kels teo büdülons dunis seimik (dabinon ye i *südava nomigevik*, kela zeil binälon in suk e stabükam nomas e völadas in valem lonöfölas). Samo el Kant ämotivom goldanomi südöfik da vol valik sevädiki as prinsip südavik valemik medü Büd Verik oka:

„Ai kondötolöd teiko bai prinsip ut, tefü kel kanol otüpo vilön, das ovedon lon valemik.“
„Ai kondötolöd so, das oneodol ün timül alik menöfi e pö ol it, e pö votan alik, no teiko as med, ab id as zeil.“

IMMANUEL KANT: *Grundlegung zur Metaphysik der Sitten* (= Stabam metafüda südas), Akademie-Ausgabe Kant Werke IV, pads: 421, 429, 10-12.

Votaflano, *südav bepenamik* bejafon fomälodis südöfik distöfik dabinöl e steifülön ad suemön e bepenön onis kuratiko. Stab südava valemik binon Meta-südav, kel dileton spiki dö südav e suemodis südavik („gud“, „bad“, „dun“).

Südav duton lü donajäfüds ut filosofa, kelis jünü te nemödo pekrütöns u pesäkädabükons fa nolavs votik. Gü cced sevädik, das tefädim nezesüdükon südavi, sinif gloföl onik logädon pö daved ai distöfikumöl jäfüdasüdavas (o.b. sanavasüdav, nimasüdav, nolavasüdav, nünömavasüdav), äsi pö jaf stitodas äs Südavacäm Netik Deutäna (= „Nationaler Ethikrat Deutschlands“).

Südavans flunilabik äbinoms, bevü votikans, hiel Aristoteles, pikurans e stoikans, äsi hiel Thomas Aquinas, hiel Immanuel Kant, hiel Jeremy Bentham, hiel John Stuart Mill, hiel Max Scheler, hiel Hans Jonas e hiel Karl-Otto Apel.

Gitafilosop

Geb stedöfik südava patuvon in gitafilosop, kel binon leigüpo bal stabajäfüdas gitanolavas. Stabü cödam dunas as „gudiks“ e „badiks“, pabetikon säkis dö git e gid, äsi dö seks nedema nomas südöfik e südavikas. Klüliko gitafilosop säkon i dö daved, stidam e legükam gita, dö tefs vü „natagits“ (a. s. gits mena) e „gits pelonöl“ („git siädimik“), äsi dö veütasökaleod gitanomas. Ans yegädas at pavestigons i fa filosof bolitik.

Gitafilosopans famik binoms hiel Hugo Grotius, hiel Niccolò Machiavelli, hiel Thomas Hobbes, hiel Hans Kelsen, hiel Gustav Radbruch, hiel H. L. A. Hart, hiel Niklas Luhmann, hiel Jürgen Habermas, hiel John Rawls, hiel Ronald Dworkin e hiel Robert Alexy.

Bolitafileosop

Bolitafileosop ü filosop bolitik, äs gitafilosop, pakoupon gretadilo fa nolavs nilöfik. Dils gretik bespikama filosofik jenons pö gitanolav e pö bolitanolav. Daved, leg e stabs Tata pavestigons fa tatateor. Bolitateor bejafon säkis tefü reigamod gudikün, tefs vü sifan e tat, dilam nämädas, lon, dalab, sef e lib.

Keblünans veütik jäfüde at binoms, bevü tikans bolitik votik, hiel Platon, hiel Aristoteles, hiel Augustinus, hiel Marsilius di Padua, hiel Niccolò Machiavelli, hiel Thomas Hobbes, hiel John Locke, hiel Jean-Jacques Rousseau, hiel Immanuel Kant, hiel Karl Marx, hiel Mihail Bakunin, hiel Carl Schmitt, hiel Hannah Arendt, hiel Karl Popper e hiel Michel Foucault.

Jäfüds nulikum

Filosop tikāla e seveda

Do jāfons me sākāds vemo bāldiks, filosop tikāla e filosop seveda binons jāfūds nog nuliks ā yumōls lū jāfūds e nolavs nilōfiks, soās sevedanolav e nevanolavs. Zānodū ons tuvoy sākis tefū natāl tikāla e seveda, tefs vū koap e lan, stōf e tikāl. I mōg libavila, āsi natāl stadas tikāla, nināda seveda e senālas (els *qualia*) pavestigons fa jāfūd at. Tuvoy is i cōdami sevedastadas distōfik, bespikami sagata mekavik, dōbati dientifa Ita e sākādi dabina mōgik lailifa pos deadam.

Menav filosofik nulādik

Menav filosofik nulādik vestigon natāli mena, no as pōsod, ab as bidasot. Ibā mens it bejāfons oni, binon natālo okmedit, labū leigūpo logam ninālik e plōdik. Dabinamod mena pavestigon demōlo nūnis e lecedis nolavas valik.

Natāl mena binon fulū lerāts. Plad mena in leval, tefs vū kuliv e nat, tefs vū men it e menef, sākāds genōfa, rōuls lōfa e deada binons ans stabasākas menava filosofik. Va men binon ma natāl oka gudik u badik, va māpet e lied binons dils zesūdik dabina menik, va lif jenōfo labon siāmōfi: i sākāds valik at dutons lū jāfūd at. Vestigon i zesūdis e fāgis mena, soās okjenōfukam, jafāl, nitedāl, nāmādivili e votanilōf, pubod: lib e sienam Votana.



Tiādapad lebuka: *Leviathan* hiela Thomas Hobbes, pāpūbōl ün 1651. Koap Rega, labū sūmbols nāmāda volādik e lanōfika, fomon oki me koaps reigābas mōdik.



Pānot: „Kiōpao kōmobs-li? Kins binobs-li? Kiōpio golobs-li?“ (1897-98) hiela Paul Gauguin.

Filosopans veūtik pō sākāds menavik āvōbōls binoms hiel Thomas Aquinas, hiel Immanuel Kant, hiel Arthur Schopenhauer, hiel Friedrich Nietzsche, hiel Søren Kierkegaard, hiel Max Scheler, hiel Arnold Gehlen, hiel Ernst Cassirer, hiel Helmuth Plessner āsi dabinimans valik.

Pato ün dil telid tumyela 20id filosofans anik ākrūtōns teorodis dō natālapats valemik mena, vū kels samo (me kazets distik) hiel Michel Foucault e hiel Jürgen Habermas.

Mūster filosofik

Do binets mūsterik suvo ākomons pō vōnaoloveikods filosofik vesūdānik e lofūdānik, suemod: „Mūster filosofik“ binon nog nulik. Soās el *Philosophia perennis*, sagon, das dabinons verats laidūpik, necenōl ā valemō lonōfōls demū lejenōf e men, ab votaflano kazeton, ās julāls mūsterik valik, buami bina anu-ed-is

atimik, veüti logedama nenzeilik, diniti jafäda e sinifi staböfik tefas vü dabin yegas e löl voläda.

Pö vobametod okik, müster filosofik golon etflanü sims tikäla e küpälükon dö sevs e sevamods belifoviks, ab i vüpösodiko sagoviks ä filosofiko bevoboviks. Temats cifik müstera filosofik binons vü votiks belifot nepubama teila vü küpedan e paküpedölos, kobükam taamas valik in God (el „*coincidentia oppositorum*“), mög balama mena e Löla (el „*unio mystica*“) e kom godöfikosa pö men („*scintilla animae*“).

Filosopans vesüdänik alik, pö kela tid binets müsterik patuvons, binons hiel Plotinus, hiel Mastan: Eckhart, hiel Nicolaus se Cusa, hiel Jakob Böhme, hiel Gottfried Wilhelm Leibniz, hiel Blaise Pascal, hiel Baruch de Spinoza, hiel Martin Heidegger, jiel Simone Weil e hiel Ken Wilber. Pro filosof neyuropik, bu val pro filosof lofüdänik, müster labon vönaoloveiko rouli vemo veütiki. Ön mod patedik lovegolon love mieds filosofa asi rela, samo el zen, el yoga, sufim, kabaal e müster kritik.

Literat

1. Platon, *Politeia* 514a-520d. (Ad zeil veratik blöfäda ela Plato: dugaroul bolitik filosofanas pö el *polis*, no nedoy küpälön is.)
 2. Carl Friedrich von Weizsäcker, *Die Einheit der Natur* (Baläl Neta, 1971)
 3. Smalot 35DK (vödem smalotas ela Herakleitos, ini Deutänapük petradutöl).
 4. Immanuel Kant. *Kritik der reinen Vernunft* (Krüt täläkta rafinik), II 2 2
 5. Martin Heidegger. 1935. *Einführung in die Metaphysik* (Nüdugot ad metafüd).
-

Pekopiedon se „<https://vo.wikipedia.org/w/index.php?title=Filosop&oldid=3174989>“

Pad at pävotükon lätiküno tü düp 13:33, ün 2014 setul 16id.

Text is available under the Creative Commons Attribution-ShareAlike License; additional terms may apply. See Terms of Use for details.